

PIRRO THOMO

«KULLAT» E SHQIPËRISË SË VERIUT SI BANESA FSHATARE DHE PROCESI I FORMIMIT TË TYRE

Banesat e fortifikuara të Shqipërisë së Veriut, ose siç njihen gjerësisht në popull e në literaturë «kullat», kanë tërhequr vëmendjen e mjaft studiuesve dhe janë bërë objekt i studimeve të shumta. Duke u synuar të vihet në dukje tipari më i dukshëm, ai i karakterit fortifikues, ato janë konsideruar më tepër si ndërtime mbrojtëse. Si rrjedhim, ka pasur një prirje për të gjetur ngjashmëritë ose lidhjet e «kullave» me ndërtimet mbrojtëse.

Sigurisht që çdo objekt mund të shihet nga kënde vështrimi të ndryshme. Por, na duket se mënyra e mësipërme e trajtimit është e njëanshme. Ajo le pa prekur një tipar që është thelbësor, karakterin banesë. Në këtë mënyrë, një trajtim i tillë i shkëput «kullat» nga banesat e tjera të krahinës, nga ato të fazave më të hershme ose bashkëkohëse, i shkëput nga rruga e evolucionit të banesave, shtytëse për të cilën janë ndryshimi i marrëdhënieve ekonomike e shoqërore. Nga ana tjetër, ngjashmëritë me ndërtimet mbrojtëse nuk janë marrë në procesin historik të zhvillimit të tyre, ato janë të jashtme, si ngjashmëri në teknikën e ndërtimit, ngjashmëri krejt formale në disa elemente etj.

Pikërisht këto mungesa kanë shpënë shpeshherë në përfundime të pabazuara mbi origjinën e kullave ose të banesave të fortifikuara të Shqipërisë së Veriut, duke i konsideruar ato si mbartje nga popuj të tjerë¹⁾. Por, në qoftëse do të nisemi nga funksioni më përcaktues i këtyre ndërtimeve, nga funksioni banesë, në qoftëse do të mirrnim në konsideratë shkallën e përhapjes së tyre, shtresat e popullsisë që i përdorën këto ndërtime, do të arrinin në përfundime me mjaft interes si në aspektin historik, ashtu dhe në atë arkitektonik.

Banesat e mbyllura, të cilat shpeshherë marrin tipare mbrojtëse, kanë qenë të zakonshme në krahinat e Shqipërisë së Veriut. Por, ne kemi zgjedhur si objekt për këtë kumtesë vetëm banesat e fortifikuara të Malësisë së Gjakovës dhe të Matit. Kjo zgjedhje nuk është bërë pa qëllim, sepse së pari, në këto dy krahina banesat e fortifikuara shfaqen në for-

1) F. Nôpcsa, *Albanien, Bauten, Trakten, Gerate Nordalbanians*, Berlin und Leipzig, 1925, fq. 57; Haberlandt, *kulturwissenschaftliche Beitrage zur Volkskunde von Montenegro, Albanien und Serbien*, Wien, 1917, f. 64.

mën e tyre më të përkryer nga ana arkitektonike dhe, së dyti, këtu banesat e fortifikuara, më tepër se kudo, patën një shtrirje mjaft të madhe, duke u përhapur dhe në shtresat e gjera të fshatarësisë dhe duke u bërë banesa mbizotëruese në krahinë. Ky fakt ka rëndësinë e vet sepse, duke qenë ndërtime masive, ato pasqyrojnë me besnikëri gjendjen e marrëdhënieve ekonomike e shoqërore të fshatarësisë dhe ndryshimet që ato kanë pësuar. Gjithashtu edhe huazimet e mundshme marrin një kup-tim tjetër, sepse banesat pasqyrojnë një mënyrë jetese të caktuar.

Banesat e fortifikuara, në trajtën që i gjejmë sot, ishin bërë ndërtime të zakonshme në këto krahina në gjysmën e dytë të shekullit të kaluar, duke arritur kulmin e përhapjes nga fundi i këtij shekulli dhe në fillim të shek. XX.

BANESA E MALËSISË SË GJAKOVËS² (Tab. I)

Banesat më tipike, në këtë krahinë kanë qenë trekatëshe. Kati përdhes ishte një ambient i mbyllur, përgjithësisht pa dritare dhe përdorej për strehimin e bagëtive. Kati i dytë përmblihte disa ambiente, nga të cilat më kryesorja ishte «shtëpia e zjarrit» ose «e grave», ku gatuhej ushqimi. Krahas saj ndërtoheshin dhomat e fjetjes për çiftet ose «qylaret». Zakonisht, çdo banesë kishte dy ambiente të tilla me përmasa të vogla. Gjithnjë në katin e sipërm vendosej dhoma e miqve, e cila paraprihej nga një ambient mjaft i gjërë («divanhanja»), ndërsa përbri ndahej një koridor i ngushtë që të çonte në WC. «Divanhanja» përdorej si një vend pune ose shlodhjeje. Në një qoshe të saj formohej një kënd me një platformë të ngritur, që quhej «dyshekllek». Muri i jashtëm i dyshekllekut ishte i hollë, zakonisht i dalë pak jashtë rafshit të mureve perimetralë të ndërtesës dhe përmbante një varg ditaresh të vogla.

Hyrja për në banesë mund të ishte në katin përdhes, me shkallë të brendshme. Por shpeshherë hyrja bëhej me shkallë të jashtme drejt në katin e dytë dhe që andej bëhej shpërndarja për në katet e tjera.

Në pamjen e jashtme këto banesa dalloheshin nga volumni i mbyllur, me hapësira ndriçimi të pakta. Këto ishin të reduktuara në frëngji, në katin përdhes, shtoheshin pak në katin e dytë dhe akoma më tepër në katin e sipërm, me dritaret e dyshekllekut dhe të dhomës së miqve. Në mure lidheshin edhe frëngji për të qëlluar. Në disa banesa në katin e sipërm ndërtoheshin «baxhet e ujit», ose disa dalje të vogla si dollape, që përdorreshin për mbrojtjen e banesës.

Banesa të tilla janë ndërtuar, në një masë më të kufizuar në krahasim me Malësinë e Gjakovës, në të gjitha krahinat fqinjë, si në Has, në Nikaj-Mertur, etj. Ato patën përhapje të madhe edhe në disa fshatra të Rrafshit të Dukagjinit të banuara nga shqiptarët.

Po të krahasojmë banesat e fortifikuara të Malësisë së Gjakovës me banesat më të vjetra,³ do të na bien në sy paralelizma mjaft të qarta. Disa banesa të vjetra ruhen edhe sot në këtë krahinë, por nga ato gjejmë me

2) P. Thomo, *Banesat e fortifikuara në Malësinë e Gjakovës*, «St. hist» 3, 1973 f. 67-107.

3) P. Thomo, *L'architecture des habitations rurales à Has et à la Malësie de Gjakove*, në «Ethnographie albanaise», Edition spéciale, Tiranë 1976, f. 193-221.

shumicë në Has, ku tipi i vjetër i banesës u ruajt për një kohë më të gjatë, pa pësuar ndryshime thelbësore.

Në stadin më të formuar, banesat e vjetra ishin dykatëshe (Tab. II) dhe përmbanin ahurin e bagëtive në katin përdhes ndërsa në katin e sipërm ishte vendosur dhoma e miqve me divanhanen e gjerë që e paraprinte. Ambientet e tjera, si qyleret për fjetje, shtëpia e zjarrit etj., ndërtoheshin të veçanta përreth kësaj banesa, brenda një oborri të rrethuar.

Shkallët në këto banesa ishin të jashtme, prej druri. Muratura e gurit përgjithësisht ishte e lidhur me baltë e me breza druri, ndërsa strehet e çatisë ishin mjaft të dala. Muratura e divanhanes, duke filluar nga një farë lartësie nga niveli i dyshemesë së katit, ishte prej druri, dilte jashtë rrafshit të mureve prej guri dhe gjatë gjithë gjatësisë së saj, përmbante një varg me dritare. Përdorimi i lëndës së drurit dhe përpunimi dekorativ i saj, shkëputja dhe kontrasti që krijonte me volumin e poshtëm prej guri, e gjallëronin mjaft pamjen e banesës.

Rruga për formimin e këtyre banesave mund të ndiqet me lehtësi. Zanafillën ato e kanë në banesat e thjeshta me katin e sipërm prej druri, në të cilën balli i ndërtesës ishte gjysmë i hapët. Me kalimin e kohës divanhanja e hapur mbyllet, banesa pasurohet me elemente të tilla si dysheklaku dhe muratura e drurit zëvendësohet me gurë, duke lënë me dru vetëm një pjesë të katit të sipërm.

Por, rruga e ndryshimeve nuk merr fund këtu. Ndryshimet e mëtejshme lidhen kryesisht me përsosjen e teknikës së ndërtimit, me zhdukjen e elementeve prej druri dhe në ndërtimin e gjithë banesës me gurë, duke marrë gjithnjë e më tepër trajta më të mbyllura dhe tipare mbrojtëse.

Një pikë me rëndësi në rrugën e shndërrimeve të kësaj banese ishte kalimi nga banesa dykatëshe në atë trekatëshe dhe shkëputja e kësaj të fundit nga grupimi i ndërtimeve të familjes. Disa ambiente të nevojshme të familjes, deri në atë kohë jashtë, përfshihej brenda një volumi të vetëm, që siç e pamë më lart, zënë vend në katin e dytë.

Ndonëse gjatë këtij përpunimi karakteri i banesës së re, ku spikatnin tiparet mbrojtëse, ndryshoi në krahasim me të vjetrën, në kompozimin e saj u ruajt koncepti i vjetër i krijimit të ambienteve të veçanta për çdo funksion, dhe ajo që është më e dukshme, mbeti i pandryshuar dispozicioni planimetrik i katit të sipërm, i trashëguar nga banesat më të thjeshta. Ndikimi i banesave të vjetra u ndie dhe në trajtimin arkitektonik. Kështu, në banesat e para të ndërtuara krejtësisht me gurë, përpunimi i ballit të ndërtesës në katin e sipërm na kujton atë të banesave me elemente druri, si nga forma ashtu dhe nga përmasat.

BANESA E MATIT⁴ (Tab. III)

Banese më e zakonshme në Mat ishte trekatëshe, me një ambient në çdo kat: në katin përdhes mbaheshin bagëtitë, katin e dytë e zinte shtëpia e bukës, ndërsa të tretin dhoma e miqve. Në përgjithësi hyrja për në banesë ishte një e vetme, në katin përdhes dhe shkallët ishin të brendshme. Ato përfundonin drejtpërdrejt në ambientin e banimit dhe hapësira e tyre mbyllej me kapak.

4) P. Thomo, *Banese e tipit kullë në Mat dhe në Mirditë*, në «Etnografia Shqiptare», 4, 1972, f. 202-241.

Karakteristikë dalluese për banesën e fortifikuar të Matit ishte dhoma e miqve. Në faqet e saj, ose në qoshe, krijohehin disa kënde nga ndërprerja e mureve perimetrale, të quajtur «çikma». Dyshemeja e tyre ishte 40-60 cm më e ngritur nga ajo e dhomës. Ato mbylleshin nga jashtë me një mur të hollë prej guri të skalitur që dilte tej rrafshit të mureve perimetralë, të mbajtura me konsola guri dhe të pajisura me dritare të vogla. Në këtë mënyrë, «çikmatë» shërbenin më së miri si qoshke ndenjeje, por njëkohësisht pajisja e tyre me frëngji dhe vendosja në pika të tilla të dhomës, që të kontrollonin të gjitha anët e banesës, tregojnë se ato luanin një rol aktiv në mbrojtjen e ndërtesës.

Muratura e këtyre banesave ishte e ndërtuar me gurë të lidhur me llaç gëlqere. Shquheshin për një përpunim mjeshtëror të gurit porta në formë harku, muratura e «çikmave» dhe qoshet e murit. Korniza nën çati formohej nga një radhë gurësh të profiluar.

Duke pasur si qendër krahinën e Matit, kjo banesë arriti të futej, ku më shumë e ku më pak, edhe në krahinat përreth, pra në krahinën e Dibrës, në Çermenikë, në Malësinë e Krujës, si dhe në pjesën lindore të Mirditës. Me përjashtim të kësaj të fundit, në krahinat e tjera takoheshin shpesh banesa trekatëshe, (Tab. IV), me skemën kompozicionale njëkthi-nëshe në kat dhe me ndarjen funksionale sipas kateve, d.m.th. kati për-dhes për bagëti, i dyti për shtëpi buke dhe i treti për miq. Në këto banesa shkallët ishin të jashtme, muratura punohej me gurë të palatuar, të lidhur me baltë dhe të përforcuar me breza druri. Streha mjaft e dalë e çatisë e mbronte deri-diku këtë muraturë⁵.

Formulimi arkitektonik i jashtëm kishte tiparet e veta për çdo krahinë, por megjithatë mbeti si tipar dallues «qoshku» i nxjerrë në katin e sipërm të ndërtesës, hapësira e të cilit përfshihej në atë të dhomës së miqve, duke rritur në mënyrë të ndjeshme sipërfaqen e saj. Zakonisht qoshet ndërtoheshin në pamjet ballore të banesës, ose vendoseshin në pikat më të larta, prej nga hapej një pamje e gjerë e rrethinave. Përpunimi i brendshëm, trajtimi dekorativ dhe vendosja në banesë, tregojnë qartë se ky element ishte konceptuar si vend për ndenje e çlodhje. Pra, këtu kemi dallime nga ana arkitektonike dhe funksionale të një elementi paraqitës në një ambient kryesor, parim të cilin e gjejmë të zbatuar në forma të ndryshme dhe në mjaft tipe të tjera banesash, si në vendin tonë, dhe në vendet fqinj.

Disa banesa të vjetra, të mbetura në këmbë, na dëshmojnë se kjo mënyrë ndërtimi ka qenë e përgjithshme edhe në Mat, dhe, në qoftë se do të shtyhem më tej në shtresëzimin tipologjik në kohë, do të arrijmë në një tip tjetër edhe më të vjetër banese. Karakteristikat e këtij tipi kanë qenë: shtrirja në gjerësi dhe përfshirja në të e një numri të madh ambiente. Në disa raste kjo banesë përmbante dhe një bërthamë trekatëshe me një ambient në çdo kat (fig. 1). Kjo bërthamë, me kohë, shkëputet nga banesa e madhe dhe fillon të përgjithësohet si ndërtim më vete. Në krahinat e tjera kjo lloj banese vazhdoi të ruhet, ndërsa në Mat pësoi shndërrime të mëtejshme drejt një banese me tipare mbrojtëse. Prirjet fortifikuese nuk kanë munguar edhe te banesat e vjetra. Për këtë qëllim është kërkuar zgjidhje në mënyra të ndryshme, siç është p.sh. ndërtimi

5) P. Thomo, *Banesat me «qoshk» në Shqipërinë e Veriut*, në «Etnografia Shqiptare» 8, 1976, f. 119-237.

i «kullëzave» mbrojtëse ngjitur me banesën, ose mbi të, pa prekur, megjithatë, formulimin arkitektonik të përgjithshëm të banesës. Siç duket, kjo mënyrë fortifikimi, nuk gjeti përhapje dhe ia la vendin mënyrës tjetër,



Fig. 1 Banesë e vjetër në krahinën e Matit.

tër, asaj të përpunimit konstruktiv të banesës, të zbatuar gjerësisht në Mat.

Në disa shembuj, ku kemi gjetur, ngjitur pranë njëra-tjetrës, banesa që u përkasin fazave të ndryshme ndërtimi, dëshmojnë qartë për rrugën që ndoqi shndërrimi i mëtejshëm i banesave në Mat. Siç shihet banesat e reja, duke pasur të njëjtën skemë kompozicionale dhe zgjidhje funksionale të banesës së vjetër, ndryshonin nga ato për sa i përket teknikës së ndërtimit: nga mure të lidhura me baltë e breza druri u kalua në mure solide me laç gëlqereje. Shndërrimet shtyhen më tej. Shkallët u futën brenda ndërtesës. Më së fundi, qoshket pësuan dhe ato ndryshime, si në destinacion, ashtu dhe në material e përpunim. Duke u vendosur në disa pika të ndërtesës, ato morën një funksion të dyfishtë për ndenje dhe për mbrojtje. Tashmë ato ndërtohen prej guri, dhe në përputhje me këtë material, dalja e tyre u bë shumë më e vogël.

* * *

Nga sa thamë më lart mund të nxjerrim disa përfundime të përgjithshme:

1) Burimet historike dhe disa mbeturina të ruajtura deri në ditët tona tregojnë se ndërtimi i kullave në vendin tonë del që shumë kohë më parë. Këto në përgjithësi kanë qenë kulla feudalësh.

Në vendet e tjera të Ballkanit krahinat më në zë për ndërtimin e kullave kanë qenë Hercegovina në Jugosllavi dhe Manja në Greqi. Në qoftë se do të bënim një krahasim të shpejtë të banesave tona të fortifikuara me kullat e vjetra që ruhen në vendin tonë dhe në vendet fqinje, do të na binte në sy një ndryshim i dukshëm, si nga trajtimi arkitektonik, ashtu dhe nga ai funksional. Nga ana arkitektonike kullat e marra për krahasim dallohen nga lartësia shumë e madhe, numri i madh i kateve dhe trajtimi i ndryshëm arkitektonik. Ndërsa nga ana funksionale,

ato kanë shërbyer si vend mbrojtjeje nëpër manastire, nëpër pronat e çifligarëve, ose për mbrojtjen e fiseve dhe, në disa raste, për banim të përkohshëm. Funkcioni i banimit dilte në plan të dytë, përderisa kullat shoqëroheshin gjithnjë me ndërtesa të tjera banimi.

2) Analiza e mësipërme dhe vendosja në kohë e banesave të fortifikuara në Shqipërinë e Veriut, na tregojnë për një lidhje të padyshimtë me banesat e mëparshme ose bashkëkohëse të krahinës ose të krahinave fqinje. Kjo na bën t'i konsiderojmë «kullat» si një etapë të mëtejshme në rrugën e shndërrimeve të banesave.

3) Krahasimi ndërmjet banesave të fortifikuara në Malësinë e Gjakovës dhe të Matit na jep, krahas anëve të përbashkëta, edhe dallime jo më pak të rëndësishme. Ato shfaqen, në radhë të parë, në kompozimin planimetrik dhe shtyhen në ekzistencën e elementeve të ndryshme karakteristike. Ndërsa në Mat mbizotëronte skema njëkthinëshe e kateve, në Malësinë e Gjakovës katet e banesës ishin më të pasura me ambiente.


Këto ndryshime dëshmojnë se nuk kemi të bëjmë me një tip të gatshëm kulle të sjellë nga jashtë, siç pretendon Nopça ose Haberlandi. Ato dëshmojnë gjithashtu mbi rolin e madh të komponentit vendës në formimin e banesave të fortifikuara. Në të dy krahinat ideja për ndërtimin e një banese të fortifikuar u realizua në trajta të ndryshme, sepse dhe pikënisja që e ndryshme.

4) Përhapja në masë e këtyre ndërtimeve ishte një faktor me rëndësi që ndikoi në ruajtjen e mjaft tipareve thelbësore të banesave të vjetra. Të tilla janë skema funksionale dhe kompozicionale, ruajtja e elementeve arkitektonike karakteristike, si divanhanja, qoshket, etj., të cilat me kohë kishin hyrë në jetën e fshatarësisë së këtyre krahinave.


5) Shndërrimet që ndodhën në banesë shprehin dhe ndryshimet që ndodhin në marrëdhëniet shoqërore dhe ekonomike të fshatarësisë së këtyre krahinave. Siç e vumë në dukje, në të dy krahinat, ka ndodhur i njëjti fenomen. Grupimet e ndërtimeve të familjes, ose banesat e mëdha me shumë ambiente, që shprehin një mënyrë jetese kolektive të një familjeje të madhe, u lënë vendin banesave të veçanta me një sasi të vogël ambientesh të nevojshme, që i duheshin një familjeje të veçuar. Pra, momenti i përgjithësimit, si tip ndërtimi i banesave të veçuara, pasqyron shpërbërjen e familjes së madhe. Familjet e veçuara të ndodhura para një realitetit shoqëror ku mbizotëronte anarkia dhe pasiguria publike, rreziku i plaçkitjeve nga familjet e pasura, siç ishin «oxhaqet» në Mat, ngushtimi i rrethit të personave përgjegjës për marrjen e gjakut etj., u detyruan të marrin masa vetëmbrojtëse, të cilat u shprehën, në radhë të parë, në fortifikimin e banesës. Nga ana tjetër, shkalla e përhapjes së banesave të fortifikuara, tregon dhe intensitetin e këtyre ndryshimeve.

6) Ndonëse në banesat e fortifikuara pati një ngritje cilësore përsa i përket teknikës së ndërtimit, ato jo vetëm që nuk sollën asgjë të re në zhvillimin kompozicional të banesës, por, përkundrazi, e penguan këtë zhvillim.


Kullat në Shqipërinë e Veriut mbyllën një periudhë të gjatë shndërrimesh dhe përpunimesh të pandërprera në fushën arkitektonike të së kaluarës dhe, më së fundi, u lanë vendin tipave të tjerë të banesave të formuara në kushte krejt të tjera mbas Çlirimit, sidomos mbas shndërrimeve rrënjësore që pësuan fshatrat e këtyre rretheve në vitet '60.




Tab. I




Tab. II



Tab. III





Tab. IV